



## Allahov zakon promjene (Medina)

Hatib: dr. Husejn ibn Abdulaziz Alu Šejh

13. džumadel-ula 1446. godine po Hidžri / 15. novembar 2024.

Hvala Allahu, Njega hvalimo, od Njega pomoć i oprost tražimo. Utječemo se Allahu od zla naših duša i naših loših djela. Koga Allah uputi, niko ga ne može u zabludu odvesti, a koga On u zabludi ostavi, niko ga ne može uputiti. Svjedočim da nema boga osim Allaha, jedinog, Koji nema sudruga, i svjedočim da je naš vjerovjesnik Muhammed Njegov rob i poslanik. Allahu moj, blagoslovi ga i daruj mir njemu i njegovoj porodici i ashabima.

O muslimani, bojte se Allaha i pokoravajte Mu se, On će vam povećati nagradu i popraviti vaša djela. "Onaj ko se Allaha boji, On će mu izlaz naći." (Et-Talak, 2)

"Onaj ko se Allaha boji, On će mu sve što treba učiniti dostupnim." (Et-Talak, 4)

"Onaj ko se Allaha boji, On će mu grijehe oprostiti i nagradu veliku dati." (Et-Talak, 5)

Iz Allahove Knjige i sunneta Njegovog Poslanika moramo razumjeti uzroke upute i uspjeha, te puteve ponosa, sreće i dobrote. Dva ajeta iz Allahove Knjige osvjetljavaju islamskom ummetu put sigurnosti, preduvjete spasa i faktore uspjeha. Kada shvatimo njihov koncept, s potpunim razumijevanjem i pronicljivim vidom, oni će nam pokazati put izlaza iz uzroka propasti i patnje.

Allah kaže: "Allah neće izmijeniti jedan narod dok on sam sebe ne izmijeni." (Er-Ra'd, 11)

Allah, također, kaže: "To je zato što Allah neće lišiti blagostanja narod kome ga je podario – sve dok se on sam ne promijeni." (El-Enfal, 53)

Ovo je jedan od univerzalnih božanskih zakona koji važe za cijelo čovječanstvo, a islamski ummet, prema uputama dviju objava: Kur'ana i sunneta, podliježe ovom





zakonu. Blagostanje, uspjeh, ponos i odlikovanost islamskog ummeta nad drugim narodima ovise o pridržavanju vjere, poštovanju šerijata njihovog Stvoritelja, pokornosti Allahu i slijedenju sunneta Njegovog Poslanika. Stoga, mora postojati ozbiljna strategija u odgajanju duša i planska promjena kako bi se pročistile misli i karakteri onim što je islam donio, naređujući pročišćavanje duša i umova, te uljepšavanje morala i ponašanja prema Stvoritelju i stvorenjima.

Islam je, u svojim izvorima, ciljevima i namjerama, odredio cilj za čovječanstvo: da postigne potpunu pokornost Stvoritelju u ovom životu i da izgradi ovaj život na ispravnim i zdravim temeljima. To je ono što je islam učinio u dušama ashaba, pretvarajući ih u najveće uzore. Oni su prešli iz obožavanja ljudi u obožavanje Gospodara ljudi, iz tjeskobe dunjaluka u širinu ahireta i oba svijeta, iz lošeg morala i uvjerenja u najbolje, najljepše i najpotpunije.

Također, ovo je Allahov zakon u svakom vremenu. Ibn Džerir u komentaru ajeta: "Allah neće izmijeniti jedan narod dok on sam sebe ne izmijeni" (Er-Ra'd, 11), kaže: "Allah neće promijeniti stanje naroda iz zdravlja i blagodati u propast dok se oni sami ne promijene (nagore), čineći nepravdu jedni drugima i napadajući jedni druge. Tada će Allah spustiti Svoju kaznu i promjenu."

O muslimani, Allahov zakon, s Njegovim potpunim znanjem, pravednošću i mudrošću, jeste da On neće promijeniti stanje naroda iz jednog u drugo (boljeg u lošije), osim zbog njih samih i onoga što su uradili svojim rukama. Ako su na ispravnom putu, u dobru i blagostanju, pa se promijene (nagore), Allah će promijeniti njihovo stanje kaznama, nesrećama i teškim iskušenjima različitih vrsta, fizičkih i duhovnih. Allah može odgoditi kaznu Svojim robovima i dati im vremena da se pokaju i vrate Njemu. Možda će im kazna biti odgođena do ahireta, da bi bila još teža i veća. Isto tako, ako su u teškim iskušenjima i nevoljama, pa se iskreno pokaju i vrate Allahu, Allah će promijeniti njihovo stanje u neprekidne blagodati i razne oblike milosti. Allah kaže: "A da su stanovnici sela i gradova vjerovali i grijeha se klonili, Mi bismo im blagoslove i s neba i iz zemlje slali." (El-A'raf, 96) Blagodati traju s bogobojaznošću i pokornošću, a gube se s grijesima i nepokornošću, te kršenjem





Allahovog šerijata. "... i kad je Gospodar vaš objavio: 'Ako budete zahvalni, Ja ću vam, zacijelo, još više dati; budete li nezahvalni, kazna Moja doista će stroga biti.'" (Ibrahim, 7)

U ovim izuzetno teškim vremenima obaveza je muslimana, da se ozbiljno trude i djeluju u skladu sa šerijatskim uzrocima, koji će popraviti njihovo stanje i zaštititi njihove zajednice od zala i smutnji. To uključuje ozbiljan rad na jedinstvu safova, odbacivanje podjela, izbjegavanje neprijateljstva i udaljavanje od izazivanja smutnji i neprijateljstva među muslimanima. Potrebno je raditi na svemu što zbližava i ne udaljava, okuplja i ne razdvaja, kao odgovor na Allahove riječi: "Svi se čvrsto Allahova užeta držite i nikako se ne razjedinjujte!" (Ali Imran, 103)

Onaj ko poštuje Allahove naredbe i pridržava se Njegovog šerijata, Allah će ga zaštititi, učiniti sretnim, pomoći mu, dati mu ponos i popraviti njegovo stanje.

Allah kaže: "Ono što žele – vjernici će postići." (El-Mu'minun, 1)

Allah također kaže: "Allah doista štiti vjernike." (El-Hadždž, 38)

On, također, kaže: "Bit će sigurni samo oni koji vjeruju i vjerovanje svoje s mnogoboštvom ne miješaju; oni će biti na Pravome putu." (El-En'am, 82)

Naš Vjerovjesnik, sallallahu alejhi ve sellem, kaže: "Čuvaj Allaha, i Allah će tebe čuvati."

Muslimanima je dužnost, svakoga prema svojim mogućnostima, da rade sve što je vjerski i dunjalučki korisno kako bi, uz Allahovu pomoć, sačuvali svoju sigurnost i sigurnost svojih zajednica, prema Allahovoj zapovijedi: "I protiv njih pripremite koliko god možete snage." (El-Enfal, 60)

Koliko muslimani imaju neprijatelja koji vrebaju, želeći uništiti njihove zemlje i zavodeći njihovu omladinu?

Svi su odgovorni pred Allahom da rade ozbiljno, kako bi postigli blagostanje i napredak u svim sferama života. Potrebno je ulagati trud i raditi na reformama i





napretku, s kontinuiranim trudom i potpunim razumijevanjem savremenog svijeta u kojem živimo.

Moramo potpuno shvatiti da rješavanje životnih problema podliježe zakonitostima svrsishodne promjene i produktivne izgradnje, kako bi se otklonile prepreke i olakšali putevi ka prosperitetnom životu. To je zahtjev islama i jedan od njegovih uzvišenih ciljeva.

Kada se oslonimo na Allaha, držimo se Njegovog užeta i tražimo Njegovu pomoć, iskreno radeći na unapređenju života i postizanju sreće na ahiretu, i kada težimo onome što popravljaja, a ne kvari, usrećuje, a ne unesrećuje, gradi, a ne ruši, tada će Allah, džellešanuhu, učiniti naše korake uspješnim, popraviti naša djela, osvjetliti nam put i pomoći nam u svemu što je korisno za naš dunjaluk i ahiret. "Kada se odlučiš, osloni se na Allaha." (Ali Imran, 159)

U islamu nema mjesta za lijenost u konstruktivnom popravljaju, niti za lijenost u stalnom korisnom doprinosu. "I reci: "Trudite se! Allah će trud vaš vidjeti, a i Poslanik Njegov i vjernici."" (Et-Tevba, 105) Naš Poslanik, sallallahu alejhi ve sellem, kaže: "Utječem se Allahu od nemoći i lijenosti."

O muslimani, jedna od najvećih dužnosti muslimana je da preispitaju svoje stanje i da budu svjesni Allaha u svim svojim poslovima. To uključuje povratak jedinstvu safova i ujedinjenju riječi, brigu o bratstvu u vjeri i saradnju na očuvanju domovine i sigurnosti društva od svega što može narušiti njegov mir ili ugroziti sigurnost. Uzvišeni Allah kaže: "Vjernici su samo braća." (El-Hudžurat, 10)

Naš Vjerovjesnik, sallallahu alejhi ve sellem, kaže: "Primjer vjernika u njihovoj međusobnoj ljubavi, milosrđu i saosjećanju je kao primjer jednog tijela – kada jedan dio tijela oboli, cijelo tijelo osjeća nesanicu i groznicu."

Jedan od najvećih zločina u islamu je napad na muslimane, bilo na njihov život, čast ili imovinu, a kako je tek kada se svi ovi zločini spoje u jedan zločin. Uzvišeni Allah kaže: "Onome ko hotimično ubije vjernika kazna će biti – Džehennem, u kome će





vječno ostati; Allah će na njega gnjev Svoj spustiti i proklet će ga i patnju mu veliku pripremiti." (En-Nisa, 93)

O ummete islama, hoće li biti povratka ispravnom putu i konsultovanja šerijata i zdravog razuma? Ovaj dunjaluk nije ništa drugo do varka. Zato se bojte Allaha, o muslimani, i promijenite svoje stanje prema onome čemu vas vaša vjera poziva, pa ćete biti uspješni i sretni.

Uzvišeni Allah naredio nam je jednu časnu stvar, koju moramo obavljati i noću i danju, a ona je donošenje salavata i selama na plemenitog Poslanika.

Allahu moj, blagoslovi i podari mir i blagoslov Svom robu i poslaniku, našem vjerovjesniku Muhammedu!

Budi zadovoljan s četvericom pravednih halifa, Poslanikovom porodicom, ashabima, tabi'inima i svima koji ih slijede u dobročinstvu do Sudnjeg dana!

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

